



PREDSTAVNIČKI / ZASTUPNIČKI DOM
KLUB POSLANIKA
STRANKE DEMOKRATSKE AKCIJE

ПРЕДСТАВНИЧКИ ДОМ
КЛУБ ПОСЛАНИКА
СТРАНКА ДЕМОКРАТСКЕ АКЦИЈЕ
BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

Sarajevo, 09.06.2025. godine

PRIMLJENO: 09.06.2025			
Organizaciona jedinica	Klasifikaciona oznaka	Redni broj	Broj priloga
01	02-1	-1321	25

1945

PREDSTAVNIČKI DOM PARLAMENTARNE SKUPŠTINE
BOSNE I HERCEGOVINE

n/r predsjedavajućeg g. Denis Zvizdić

Predmet: Prijedlog Zakona o dopunama Zakona o Javnom radio - televizijskom servisu Bosne i Hercegovine, a u skladu s članom 133. Poslovnika Predstavničkog doma Parlamentarne skupštine Bosne i Hercegovine, dostavlja se:

Na osnovu člana 104., člana 105. i člana 133 Poslovnika Predstavničkog doma Parlamentarne skupštine Bosne i Hercegovine (Službeni glasnik BiH, br 79/14, 81/15, 97/15, 78/19, 26/20, 53/22, 59/23, 87/23 i 50/24) kao ovlašteni predlagači podnosimo:

-Prijedlog Zakona o dopunama Zakona o Javnom radio - televizijskom sistemu Bosne i Hercegovine

Predlažemo da se Prijedlog zakona o dopunama Zakona o Javnom radio - televizijskom servisu Bosne i Hercegovine razmatra po **hitnom postupku** jer je formulisan na jednostavan način i postoji potreba za hitnost u u usvajanju, te se može razmatrati i usvojiti u jednom čitanju odnosno ispunjava uslove iz člana 133. Poslovnika Predstavničkog doma Parlamentarne skupštine Bosne i Hercegovine. U prilogu vam dostavljamo tekst Prijedloga zakona o dopunama Zakona o Javnom radio - televizijskom servisu Bosne i Hercegovine na bosanskom jeziku, s obrazloženjem, pregledom odredaba koje se dopunjavaju te verziju prečišćenog teksta.

ZASTUPNICI KLUBA SDA

Šerif Spago

Denijal Tulumović

Edin Ramić

Mihael Čaušević

Safet Kešo

Šemsudin Dedić

Nermin Mandra

Amor Mašović

PRIJEDLOG

Na osnovu člana IV. 4. a) Ustava Bosne i Hercegovine Parlamentarna skupština Bosne i Hercegovine, na _____sjednici Predstavničkog doma, održanoj _____2025. godine i na _____sjednici Doma naroda održanoj _____2025. godine, usvojila je

ZAKON O DOPUNI ZAKONA O JAVNOM RADIOTELEVIZIJSKOM SERVISU BOSNE I HERCEGOVINE

Član 1.

U Zakonu o javnom radio-televizijskom servisu Bosne i Hercegovine („Službeni glasnik BiH“, br. 92/05 i 32/10) iza člana 20. dodaje se novi član 20a. koji glasi:

„Član 20a.
(Dodatno finansiranje)

(1) Izuzetno, osim prihoda propisanih ovim zakonom, u slučaju nemogućnosti finansiranja redovne djelatnosti BHRT-a, isti se može finansirati i iz Budžeta institucija Bosne i Hercegovine i međunarodnih obaveza Bosne i Hercegovine.

(2) BHRT, u slučaju iz stava (1) ovog člana, podnosi obrazloženi zahtjev Ministarstvu finansija i trezora Bosne i Hercegovine, koje nakon razmatranja, a u odnosu na raspoloživa finansijska sredstva, uvrštava odobravanje sredstava u nacrt zakona o budžetu institucija Bosne i Hercegovine i međunarodnih obaveza Bosne i Hercegovine, te propisuje način realizacije.“

Član 2.

Ovaj zakon stupa na snagu osmog dana od dana objavljivanja u „Službenom glasniku BiH“, a primjenjivat će se i u odnosu na Zakon o budžetu institucija Bosne i Hercegovine i međunarodnih obaveza Bosne i Hercegovine za 2025.godinu.

PS BiH broj: _____
_____2025.godine
Sarajevo

Predsjedavajući
Predstavničkog doma
Parlamentarne skupštine BiH

Denis Zvizdić

Predsjedavajući
Doma naroda
Parlamenta Bosne i Hercegovine

Nikola Špirić

OBRAZLOŽENJE

I. USTAVNI OSNOV

Ustavni osnov za usvajanje Zakona o dopuni Zakonu o javnom radiotelevizijskom servisu Bosne i Hercegovine sadržan je u odredbama člana IV. 4. a) Ustava Bosne i Hercegovine, prema kojem je Parlamentarna skupština nadležna za „donošenja zakona koji su potrebni za provođenje odluka Predsjedništva ili za izvršenje funkcije Parlamentarne skupštine Bosne i Hercegovine po ovom Ustavu“.

II. RAZLOZI ZA USVAJANJE ZAKONA

Razlog za usvajanje Zakona o dopuni Zakonu o javnom radio-televizijskom servisu Bosne i Hercegovine sadržan je u činjenici da se Radiotelevizija Bosne i Hercegovine (u daljem tekstu: BHRT), već duže vrijeme obraća različitim organima vlasti u Bosni i Hercegovini jer se nalazi u veoma teškom finansijskom stanju i nemogućnosti obavljanja osnovne djelatnosti. Prije svega, kao jedan od osnovnih problema koji su doveli u pitanje rad i funkcionisanje je Odluka o iznosu najniže plaće za 2025. godinu („Službene novine Federacije BiH“, broj:104/24), Vlade Federacije Bosne i Hercegovine, kojom je propisana njaniža plaća za 2025.godinu u iznosu od 1.000,00 KM. Ista se u odnosu na BHRT (prema podacima BHRT-a) odnosi na obavezu usklađivanja plaća za 65% zaposlenih, preciznije za 475 zaposlenika, što na mjesečnom nivou predstavlja povećanje izdataka za plaću od 108.392,00 KM (neto iznos) odnosno 157.269,00 KM (bruto iznos). Na godišnjem nivou potreban je bruto iznos od 1.887.228,00 KM. Kao što je poznato BHRT se, trenutno, finansira iz RTV takse, koja se prikuplja isključivo uz račune JP Elektroprivreda BiH za utrošenu električnu energiju i koja se dijeli sa RTV FBiH u omjeru 50/50 %, te nije u mogućnosti povećati prihod, jer je naplata RTV takse na teritorij Federacije BiH u nadležnosti RTV FBiH, što je u skladu sa članom 18. Zakona o javnom radiotelevizijskom sistemu Bosne i Hercegovine. Isto tako opće poznato je da je član 23. stav (6) Zakona o javnom radiotelevizijskom sistemu Bosne i Hercegovine propisao da „BHRT pripada 50% netoprihoda od marketinškog oglašavanja i 50% od ukupnog iznosa RTV takse naplaćene na teritoriji Bosne i Hercegovine“. Isto, nažalost nije u primjeni od 2017. godine, te nepoštivanje zakonskih odredbi, najviše se odražava na BHRT. Također, članom 17a. stav (3) Zakonu o javnom radio-televizijskom sistemu Bosne i Hercegovine, propisano je da „Vijeće ministara BiH dužno je da u budžetu institucija Bosne i Hercegovine osigurati sredstava u visini iznosa umanjenih prihoda Javnog RTV sistema BiH nastalih zbog oslobađanja plaćanja RTV takse vlasnika prijemnika koji su trajno izgubili vid ili sluh i žive sami u domaćinstvu ili sa starateljem“. Isto se ne primjenjuje, odnosno ne vrši bilo kakvo uplaćivanje po ovom osnovu.

Članom 20. Zakona o javnom radio-televizijskom servisu Bosne i Hercegovine propisano je finansiranje redovne djelatnosti BHRT-a iz RTV taksi i marketinga. Zbog svih navedenih razloga neophodno je definisati i mogućnost finansiranja BHRT-a iz budžeta institucija Bosne i Hercegovine, imajući u vidu da se na takav način finansiraju i javni servisi u pojedinim evropskim državama. Isto tako općepoznato je činjeica da, Vijeće ministara Bosne i Hercegovine, nije podržalo saniranje duga BHRT prema Evropskoj radiodifuznoj mreži (EBU) u iznosu većem od 16 miliona KM. Prolongiranje obaveza od strane EBU je izvršeno do februara 2026. godine, nakon čega će EBU „zamrznuti sve bankovne račune BHRT-a“, što bi dovelo do potpunog urušavanja sistema funkcionisanja i prestanka sa radom BHRT-a.

Jedno od prioriteta iz Mišljenja Evropske komisije u procesu integracija Bosne i Hercegovine u EU je „osiguranje finansijske održivosti sistema javnih RTV servisa“.

Ministarstvo prometa i komunikacija Bosne i Hercegovine, do danas, nije u proceduru dostavilo novi zakon o javnom radio-televizijskom sistemu Bosne i Hercegovine, kojim bi se u odnosu na mišljenje Evropske komisije, sistem javnog emitiranja učinio održivim kroz efikasan model naplate RTV takse.

Zbog svega navedenog, potrebno je dopunama Zakona o javnom radio-televizijskom servisu Bosne i Hercegovine, stvaranjem direktnog pravnog osnova, do konačnog rješavanja održivog modela funkcionisanja javnog emitiranja, zbog hitnosti, i činjenici neusvajanja budžeta za 2025. godinu, obezbjediti sredstava za rad i finansiranje osnovne djelatnosti BHRT-a i izmirenje obaveza prema EBU, u minimalnom iznosu od 20 miliona KM i u Zakonu o budžetu institucija Bosne i Hercegovine i međunarodnih obaveza Bosne i Hercegovine za 2025.godinu.

III. OBRAZLOŽENJE PREDLOŽENIH PRAVNIH RJEŠENJA

Članom 1. Prijedloga Zakona o javnom radio-televizijskom servisu Bosne i Hercegovine vrši se dopuna na način da se iza člana 20. važećeg Zakona dodaje novi član 20a. kojim se propisuje da se izuzetno, osim prihoda propisanih ovim zakonom, u slučaju nemogućnosti finansiranja osnovne djelatnosti BHRT-a, isti može finansirati i iz budžeta institucija Bosne i Hercegovine i međunarodnih obaveza Bosne i Hercegovine, dok se stavom (2) propisuje procedura podnošenja zahtijeva, razmatranje, uvrštavanje u budžet, te način realizacije.

Članom (2) se propisuje stupanje na snagu i objavljivanje zakona, uz primjenu i u odnosu na Zakon o budžetu institucija Bosne i Hercegovine i međunarodnih obaveza Bosne i Hercegovine za 2025.godinu, pod pretpostavkom usvajanja ovog zakona prije usvajanja samog Zakona o budžetu institucija Bosne i Hercegovine i međunarodnih obaveza Bosne i Hercegovine za 2025.godinu

IV. RAZLOG ZA HITAN POSTUPAK

Ovaj Prijedlog zakona formulisan je na jednostavan način, postoji potreba za hitnost usvajanja, te se može razmatrati i usvojiti u jednom čitanju odnosno ispunjava uslove iz člana 133. Poslovnika Predstavničkog doma Parlamentarne skupštine Bosne i Hercegovine.

V. PRINCIPI NA KOJIMA JE PRIJEDLOG ZAKONA ZASNOVAN

Ovaj Prijedlog zakona zasnovan je na principima ustavnosti, zakonitosti, ravnopravnosti, transparentnosti, fiskalne i društvene odgovornost i solidarnosti.

VI. FINANSIJSKA SREDSTVA POTREBNA ZA PROVOĐENJE ZAKONA

Za provođenje ovog zakona potrebna je planirati i izdvojiti dodatna finansijska sredstva u minimalnom iznosu od 20 miliona KM u Zakonu o budžetu institucija Bosne i Hercegovine i međunarodnih obaveza Bosne i Hercegovine za 2025.godinu.

ZAKON
O JAVNOM RADIOTELEVIZIJSKOM SERVISU BOSNE I HERCEGOVINE
(Neslužbeni prečišćeni tekst¹)

Član 1.
(Predmet Zakona)

Ovim zakonom uređuje se Javni radiotelevizijski servis Bosne i Hercegovine (u daljnjem tekstu: Javni RTV servis BiH), kao i njegova registracija, djelatnost i organizacija.

Član 2.
Definicije

Definicije iz Zakona o Javnom radiotelevizijskom sistemu Bosne i Hercegovine (u daljnjem tekstu: Zakon Sistema) odnose se na ovaj zakon.

U tom smislu:

marketinško oglašavanje je svaki plaćeni, slično nadoknađeni ili samopromotivni javni oglas, uključujući sponzoriranje (kao što je definirano dalje u tekstu), u svrhu promocije, prodaje, kupovine ili iznajmljivanja proizvoda ili usluga, promocije ideje ili cilja, ili uzrokovanja nekog drugog željenog efekta od strane oglašivača ili samog servisa;

javni RTV servis je fizičko ili pravno lice s uredničkom odgovornošću za pripremu usluge radio i televizijskog programa, namijenjenog emitiranju za javnost;

evropski programi podrazumijevaju kreativne programe čiju proizvodnju ili koprodukciju vode evropska fizička ili pravna lica;

sponzoriranje je učešće fizičkog ili pravnog lica, koje nije uključeno u aktivnosti emitiranja ili u proizvodnju audiovizuelnih djela, u direktnom ili indirektnom finansiranju programa, u svrhu promocije njihovog imena, zaštitnog znaka, djelatnosti ili dostignuća;

emitiranje je početna emisija putem zemaljskog, kablovskog ili satelitskog predajnika, u kodiranom ili dekodiranom obliku, radio ili televizijske usluge namijenjene javnosti;

virtuelno marketinško oglašavanje je upotreba elektronskih sistema koji djelimično mijenjaju televizijski signal tako što se u televizijsku sliku dodaje marketinški oglas, koji u stvarnosti ne postoji na mjestu s kojeg se signal prenosi;

reemitiranje je vremenski odgođena emisija putem zemaljskog, kablovskog i satelitskog predajnika, u kodiranom ili dekodiranom obliku, radio ili televizijske usluge namijenjene javnosti;

teleshopping znači teleshopping spotove kojima se putem emisije tv signala vrši prodaja određenih proizvoda, a čija je dužina trajanja određena principima Evropske konvencije o prekograničnoj televiziji;

RTV taksa je taksa na posjedovanje radio ili TV prijemnika u domaćinstvu i kod pravnog lica;
dozvola Sistema obuhvata pojedinačne dozvole tri javna RTV servisa.

¹ Neslužbeni prečišćeni tekst sadrži: Zakon o Javnom radio-televizijskom servisu Bosne i Hercegovine ("Službeni glasnik BiH" broj 92/05) i Zakon o izmjenama i dopunama Zakona o Javnom radio-televizijskom servisu Bosne i Hercegovine ("Službeni glasnik BiH" broj 32/10) – označen *podebljanim kosim slovima*.

Ovaj neslužbeni prečišćeni tekst predstavlja neslužbenu verziju i na njega se ne može pozivati u zvanične svrhe.

Član 3.
(Registracija)

Javni RTV servis BiH upisuje se kao javno preduzeće u sudski registar kod nadležnog suda u svom sjedištu. U sudski registar upisuju se:

- a) firma i sjedište;
- b) djelatnost;
- c) odgovornost u unutrašnjem pravnom prometu;
- d) odgovornost u vanjskotrgovinskom pravnom prometu i
- e) imena lica ovlaštenih za zastupanje.

Član 4.
(Firma)

- (1) Naziv javnog preduzeća je: Radiotelevizija Bosne i Hercegovine.
- (2) Skraćeni naziv Radiotelevizije Bosne i Hercegovine je BHRT.
- (3) Nazivi javnog preduzeća BHRT i JRTSBiH moraju se istaknuti na zgradi u kojoj je sjedište BHRT-a, napisani na jezicima koji su u službenoj upotrebi u Bosni i Hercegovini, latinicom i ćirilicom.

Član 5.
(Sjedište)

Sjedište BHRT-a je u Sarajevu.

Član 6.
(Prava i odgovornost)

- (1) BHRT je pravno lice i može u pravnom prometu sticati prava i preuzimati obaveze, biti vlasnik pokretnih i nepokretnih stvari, te biti stranka u postupcima pred sudovima, drugim državnim organima i tijelima s javnim ovlaštenjima.
- (2) BHRT odgovara za obaveze cjelokupnom svojom imovinom.

Član 7.
(Djelatnost)

- (1) Djelatnosti BHRT-a su sljedeće:
 - a) naručivanje, pripremanje, proizvodnja, prijenos i emitiranje vlastitih radijskih i televizijskih programa i multimedijalnih sadržaja;
 - b) izdavanje i raspodjela štampanog materijala vezanog s vlastitim programom ili s pitanjima o emitiranju uopće;
 - c) skladištenje i korištenje arhive tonskih i videozapisa;
 - d) organizacija kulturnih, muzičkih i drugih događaja;
 - e) istraživanje javnog mnijenja, marketinške usluge i usluge oglašavanja;
 - f) pružanje usluga teleteksta i djelatnosti vezanih za ostala polja tehnologije emitiranja.
- (2) Preko zajedničkog pravnog subjekta Korporacije javnih RTV servisa BiH (u daljnjem tekstu: Korporacija), BHRT učestvuje u:
 - a) nabavci programa,

- b) uvođenju i korištenju novih tehnologija u oblasti emitiranja,
 - c) razmjeni i učešću u zajedničkim tehničkim i drugim tehnološkim projektima s drugim javnim radiotelevizijskim agencijama i producentima programa,
 - d) drugim aktivnostima u skladu sa Zakonom Sistema.
- (3) Ako je u skladu s uvjetima dozvole Sistema i na osnovu odluke Regulatorne agencije za komunikacije BiH (u daljnjem tekstu: Regulatorna agencija), BHRT može pružati dodatne programske servise, bez obzira na metod dostave (npr. on-line) ili modalitete finansiranja (npr. pay-TV).
- (4) Statutom se mogu odrediti i druge djelatnosti, pod uvjetom da nisu u suprotnosti s osnovnom djelatnošću BHRT-a, određenom ovim zakonom.

Član 8.

(Zastupljenost prema Ustavu BiH)

- (1) U obavljanju djelatnosti i u kadrovskoj strukturi BHRT provodi relevantne ustavne odredbe u vezi s jednakim pravima konstitutivnih naroda i ostalih *te ustavne odredbe o ravnopravnosti spolova* u Bosni i Hercegovini.
- (2) Programi će biti prilagođeni potrebama konstitutivnih naroda i građana BiH, uređivani i emitirani ravnopravno na tri službena jezika i dva pisma.
- (3) *Prilikom uređivanja programa, posebno u pogledu odabira programskih sadržaja i učesnika u emisijama, ravnopravno će se uzimati u obzir interesi oba spola i osigurat će se ravnopravna prisutnost oba spola u medijima.*

Član 9.

(Programski servisi)

- (1) Djelatnost BHRT-a ostvaruje se proizvodnjom i emitiranjem programa najmanje na jednoj radijskoj i jednoj televizijskoj mreži, na vlastitim frekvencijama za područje Bosne i Hercegovine.
- (2) BHRT je ovlašten da prenosi programe preko zemaljskih mreža, satelita, kablovskim ili bilo kojim drugim tehničkim sredstvima.
- (3) Zahtjevi za proširenje usluga ili dodatnim kanalima podnose se Regulatornoj agenciji.

Član 10.

(Međunarodna razmjena i ekskluzivna prava)

- (1) S ciljem ostvarivanja interesa cjelokupnog stanovništva Bosne i Hercegovine, BHRT dužan je osigurati pokrivanje najvažnijih kulturnih, sportskih, zabavnih i drugih događaja koji se održavaju u zemlji i svijetu.
- (2) Emiteri čiji programi nisu dostupni cjelokupnom stanovništvu Bosne i Hercegovine nemaju pravo na dobivanje ekskluzivnih prava za sljedeće sportske događaje:
- a) olimpijske igre;
 - b) svjetska i evropska prvenstva u nogometu, košarci, rukometu i drugim sportovima ;
 - c) utakmice u okviru zvaničnih međunarodnih takmičenja u kojima nastupaju reprezentacije Bosne i Hercegovine;
 - d) međunarodna takmičenja koja se održavaju u Bosni i Hercegovini.

- (3) BHRT će uložiti sve napore da stekne ekskluzivna prava na sve važne događaje, kako su definirani i pobrojani u stavu (2) ovog člana.

Član 11.

(Članstvo u međunarodnim organizacijama)

- (1) Korporacija zastupa interese BHRT-a u međunarodnim radiodifuznim organizacijama i asocijacijama.
- (2) BHRT je dužan osigurati korištenje prava i izvršavanje obaveze koje proizlaze iz članstva u Evropskoj uniji za radiodifuziju (EBU-UER) i iz Konvencije o prekograničnoj televiziji.

Član 12.

(Statut)

- (1) BHRT ima statut kojim se utvrđuje njegova unutrašnja organizacija, ovlaštenja i način odlučivanja pojedinih organa, te uređuju druga pitanja značajna za obavljanje djelatnosti i poslovanje BHRT.
- (2) Statut se objavljuje u "Služenom glasniku BiH".
- (3) BHRT ima i druge opće akte u skladu sa zakonom i statutom.

Član 13.

(Satelitski program)

- (1) BHRT može obavljati djelatnost međunarodnog digitalnog satelitskog operatera s ciljem pružanja RTV usluga građanima Bosne i Hercegovine koji žive van teritorije BiH.
- (2) BHRT mora posebno iskazati cjelokupne troškove pružanja usluga putem međunarodnog digitalnog satelita, uključujući troškove prijenosa, tehničkih sredstava, osoblja i programa, te ih jasno razdvojiti od troškova pružanja domaćih usluga u skladu sa svojom dozvolom.
- (3) Sredstva dobivena za pružanje usluge putem međunarodnog digitalnog satelita ne smiju se koristiti za subvencioniranje prijenosa programa BHRT-a za stanovništvo Bosne i Hercegovine koje živi na teritoriji BiH.
- (4) Pri pružanju međunarodne satelitske usluge, BHRT mora osigurati punu primjenu međunarodnih i domaćih zakona kojima je uređena zaštita autorskih i srodnih prava i intelektualno vlasništvo.

Član 14.

(Produkcioni kapaciteti)

Korporacija, u skladu sa Zakonom Sistema, upravlja prostornim, proizvodnim i tehničkim kapacitetima BHRT-a.

Član 15.

(Arhiva)

- (1) BHRT ima sva prava na arhivsku građu bivšeg Javnog preduzeća Radio-televizija Bosne i Hercegovine, i dužan se o njoj brinuti s posebnom pažnjom, kao o neprocjenjivoj kulturno-historijskoj vrijednosti i zajedničkom dobru svih naroda i građana Bosne i Hercegovine.
- (2) BHRT ima sva prava i na novo intelektualno vlasništvo koje BHRT doda u svoju arhivu.
- (3) Drugi javni RTV servisi imaju pristup arhivskoj građi BHRT-a i obrnuto.
- (4) Korporacija rukovodi postupkom čuvanja, obrade i korištenja arhivske građe u skladu s važećim zakonima i ugovor o upravljanju zaključuje se između BHRT-a i Korporacije.

Član 16.

(Položaj zaposlenih)

- (1) Na pravni položaj zaposlenih u BHRT-u, uvjete za zaključenje ugovora o radu, plaće i druga pitanja, primjenjuju se opći propisi o radu i Statut.
- (2) *Ako u postupku zapošljavanja dva ili više kandidata podjednako ispunjavaju tražene uslove, prednost će se dati kandidatu manje zastupljenog spola.*
- (3) *Na poslovima istog stepena složenosti spolovi treba da budu ravnopravno zastupljeni.*

Član 17.

(Minimum radnih obaveza)

- (1) U slučaju štrajka radnika, ne smiju biti ugrožene osnovne programske funkcije BHRT-a.
- (2) Generalni direktor, nakon konsultacija s predstavnikom većinskog sindikata, određuje radnike BHRT-a koji će obavljati osnovne programske funkcije iz stava (1) ovog člana.
- (3) Ako radnici određeni za obavljanje osnovnih programskih funkcija odbiju raditi u skladu s ovim članom, generalni direktor može za obavljanje ovih poslova angažirati druge radnike koji nisu članovi sindikata BHRT-a, kao i lica koja nisu zaposlena u BHRT-u.

Član 18.

(Primjena drugih zakona)

Na poslovanje BHRT-a, koje nije posebno uređeno ovim zakonom, primjenjuju se odgovarajući zakoni koji važe u mjestu sjedišta BHRT-a.

Član 19.

(Imovina)

- (1) Imovinu BHRT-a čine sredstva koja su prenesena u postupku likvidacije Javnog preduzeća Radio-televizije Bosne i Hercegovine kao i sredstva stečena iz drugih izvora.
- (2) Korporacija upravlja imovinom u skladu sa Zakonom Sistema.

Član 20.

(Finansiranje redovne djelatnosti)

- (1) Redovna djelatnost BHRT-a primarno se finansira iz sljedećih izvora:

- a) RTV taksa;
- b) marketing.

Raspodjela prihoda prikupljenog iz pomenutih izvora vršit će se u skladu s članom 23. Zakona Sistema.

- (2) BHRT može ostvarivati prihode iz vlastite djelatnosti uključujući komercijalizaciju autorskih i srodnih prava, proizvodnju i prodaju audiovizuelnih djela, pružanje usluga teleteksta i drugih servisa.

Član 21.

(Odgovornost za finansiranje)

- (1) Generalni direktor priprema finansijski plan za narednu godinu i dostavlja ga na usvajanje Upravnom odboru BHRT-a (u daljnjem tekstu: Upravni odbor) najkasnije do 1. novembra tekuće godine.

- (2) Generalni direktor podnosi izvještaj o poslovanju u prethodnoj godini i dostavlja ga na usvajanje Upravnom odboru najkasnije do 28. februara svake godine.
- (3) U svakoj finansijskoj godini BHRT mora osigurati da su njegovi ukupni rashodi pokriveni njegovim ukupnim prihodima.

Član 22.

(Obaveza revizije)

Obavezna je godišnja revizija nezavisne revizorske firme poslovanja BHRT-a.

Član 23.

(Organi BHRT-a)

- (1) Organi BHRT-a su:
 - a) Upravni odbor,
 - b) Poslovodni odbor.
- (2) Radom BHRT-a rukovodi Poslovodni odbor, koji čine generalni direktor i rukovodioci sektora BHRT-a.
- (3) Javni RTV servisi moraju osigurati naknade za članove njihovog Upravnog odbora uključujući i naknade za rad u Odboru Javnog radiotelevizijskog sistema Bosne i Hercegovine za one članove koji su i njegovi članovi.
- (4) Pri izboru i imenovanju članova organa BHRT-a promovirat će se ravnopravna zastupljenost oba spola, te će procenat učešća spolova u organima BHRT-a u pravilu odražavati ravnopravnu zastupljenost spolova. Diskriminacija na osnovu spola je zabranjena.*

Član 24.

(Upravni odbor)

Upravni odbor zastupa i štiti interese javnosti u pogledu radio i televizijskih programa, vrši nadzor nad cjelokupnim poslovanjem, kao i raspolaganjem imovinom BHRT-a.

Član 25.

(Sastav Upravnog odbora)

- (1) Upravni odbor ima četiri člana.
- (2) Članovi Upravnog odbora mogu biti samo državljani Bosne i Hercegovine.
- (3) Upravni odbor ima četiri člana:
 - a) po jednog iz reda svakog od konstitutivnog naroda i iz reda ostalih,
 - b) dva od ta četiri člana moraju imati prebivalište u Federaciji Bosne i Hercegovine,
 - c) dva od ta četiri člana moraju imati prebivalište u Republici Srpskoj.
- (4) Članovi Upravnog odbora samostalni su u obavljanju svoje dužnosti i ne primaju uputstva od organa koji ih je imenovao.
- (5) Mandat članova Upravnog odbora traje četiri godine i ne može se obnoviti.
- (6) Član Upravnog odbora koji je u posljednjoj godini svog četverogodišnjeg mandata obavlja dužnost predsjedavajućeg Upravnog odbora u toj godini.
- (7) Upravni odbor donosi Poslovnik o radu.

Član 26.

(Izbor, imenovanje i razrješenje članova Upravnog odbora)

(1) Parlamentarna skupština Bosne i Hercegovine *posebno vodeći računa o članu 23. stav (4) ovog zakona* imenuje članove Upravnog odbora s rang-liste kandidata koji su ušli u uži izbor (u daljnjem tekstu: rang-lista), koju mu dostavlja Regulatorna agencija u roku od 30 dana od dostavljanja rang-liste Parlamentarnoj skupštini Bosne i Hercegovine. Regulatorna agencija provodi pravičan, otvoren i transparentan postupak izbora, koristeći se standardima i rokovima propisanim Zakonom o ministarskim imenovanjima, imenovanjima Vijeća ministara BiH i drugim imenovanjima Bosne i Hercegovine s ciljem izbora najkvalificiranijih kandidata. Postupak za izradu rang-liste Regulatorna agencija počinje četiri mjeseca prije isteka mandata članovima Upravnog odbora. *Regulatorna agencija za komunikacije će pri formiranju rang-listi preduzeti sve neophodne mjere da se osigura ravnopravna zastupljenost spolova na rang-listi.*

(2) Članovima Upravnog odbora ne mogu biti imenovani:

- a) nosioci dužnosti u zakonodavnoj, izvršnoj i sudskoj vlasti, na bilo kom nivou vlasti;
- b) članovi organa političkih stranaka;
- c) zaposleni u BHRT-u, RTFBiH i RTRS i Korporaciji;
- d) zaposleni u drugim firmama koje obavljaju djelatnost radijskog ili televizijskog emitiranja, uključujući i agencije koje prikupljaju RTV taksu, članovi njihovih uprava ili nadzornih odbora, ili lica koja obavljaju poslove zbog kojih bi moglo doći do sukoba interesa.

(3) Parlamentarna skupština BiH ima ovlaštenje da donese odluku o razrješenju člana Upravnog odbora u bilo kojem od sljedećih slučajeva:

- a) ako član sam zatraži razrješenje,
- b) ako tri puta neopravdano izostane sa sjednice,
- c) ako ne učestvuje u radu u periodu od tri mjeseca.

(4) Parlamentarna skupština BiH također ima ovlaštenje da donese odluku o razrješenju člana Upravnog odbora na osnovu preporuke Regulatorne agencije, ako član Upravnog odbora nije ispoštovao uvjete iz dozvole Sistema i / ili dozvole BHRT-a.

Član 27.

(Kvorum i odlučivanje Upravnog odbora)

(1) Upravni odbor može punovažno odlučivati ako su sjednici prisutna najmanje tri člana (kvorum). Upravni odbor odlučuje većinom glasova od ukupnog broja prisutnih članova, a u slučaju jednakog broja glasova, glas predsjedavajućeg je odlučujući.

(2) Za imenovanje i razrješenje generalnog direktora, usvajanje programskih planova radija i televizije, kao i za donošenje finansijskih planova i godišnjeg budžeta, potrebni su glasovi najmanje tri člana Upravnog odbora.

Član 28.

(Naknada za rad članovima Upravnog odbora)

Članovi Upravnog odbora imaju obavezu najmanje pet dana u mjesecu raditi u Upravnom odboru i za svoj rad imaju pravo na naknadu u iznosu od tri minimalne plaće u entitetu iz kojeg dolaze, kao i naknadu razumnih putnih i materijalnih troškova u skladu s važećim aktima BHRT-a.

Član 29.

(Nadležnost Upravnog odbora)

Upravni odbor nadležan je da:

- a) donosi statut i druge opće akte;
- b) odlučuje o raspolaganju imovinom, u skladu sa zakonom i statutom;
- c) odlučuje o ulaganjima za razvoj BHRT-a, u skladu sa zakonom i statutom;
- d) usvaja izvještaje o finansijskom poslovanju;
- e) odobrava godišnji budžet i finansijski plan;
- f) usvaja programske planove za radio i televiziju;
- g) imenuje i razrješava generalnog direktora;
- h) daje saglasnost na imenovanje nosilaca najviših programskih dužnosti;
- i) odlučuje o nazivu i logu radija i televizije;
- j) prati i kontrolira zakonitost i uspješnost rada BHRT-a;
- k) predstavlja Parlamentarnoj skupštini BiH i javnosti godišnje finansijske planove i planove programa i izvještaje o realizaciji tih planova i
- l) obavlja druge poslove, u skladu sa zakonom i statutom.
- m) osigurava uvjete iz dozvole Sistema.

Član 30.

(Savjetodavni organi)

Upravni odbor može osnovati savjetodavne organe za razmatranje i savjetovanje o različitim aspektima djelatnosti BHRT-a.

Član 31.

(Imenovanje i mandat generalnog direktora)

- (1) Generalnog direktora imenuje Upravni odbor na osnovu javnog konkursa, na način određen u članu 27. stav (2) ovog zakona, *posebno vodeći računa o članu 23. stav (4) ovog zakona.*
- (2) Mandat generalnog direktora traje pet godina i može se obnoviti samo jednom.
- (3) Generalni direktor može biti samo lice koje je državljanin Bosne i Hercegovine i ispunjava sve uvjete predviđene statutom.
- (4) Za generalnog direktora ne može biti imenovano lice koje obavlja izvršnu, zakonodavnu ili sudsku funkciju na svim nivoima u Bosni i Hercegovini, ili koje je vlasnik, odnosno suvlasnik preduzeća koje obavlja djelatnost radijskog ili televizijskog emitiranja i ako je njegova funkcija nespojiva sa Zakonom o sukobu interesa.

Član 32.

(Nadležnost generalnog direktora)

- (1) Generalni direktor rukovodi poslovanjem, predstavlja i zastupa BHRT i odgovoran je za zakonitost poslovanja i provođenje odluka Upravnog odbora.
- (2) Generalni direktor odgovoran je za osiguranje poštivanja utvrđenih programskih smjernica i principa određenih zakonom.
- (3) Generalni direktor imenuje rukovodno osoblje, u skladu s najvišim profesionalnim kriterijima i na način određen statutom.

- (4) Generalni direktor obavlja druge poslove u skladu sa zakonom i statutom.
- (5) Generalni direktor odgovara za ispunjenje uvjeta iz dozvole Sistema i dozvole BHRT-a.
- (6) Generalni direktor osigurava izradu godišnjeg finansijskog plana i budžeta za Javni RTV servis BiH u saradnji s generalnim direktorom zajedničkog pravnog subjekta.
- (7) Generalni direktor osigurava koordinaciju i saradnju s generalnim direktorima javnih RTV servisa i generalnim direktorom zajedničkog pravnog subjekta.

Član 33.

(Razrješenje generalnog direktora)

- (1) Upravni odbor obavezan je razriješiti generalnog direktora u sljedećim slučajevima:
 - a) ako sam zatraži razrješenje u skladu s ugovorom o radu;
 - b) ako nastanu takvi razlozi koji po posebnim propisima ili propisima kojima se uređuju radni odnosi dovode do prestanka ugovora o radu.
- (2) Upravni odbor može razriješiti generalnog direktora ako ocijeni da generalni direktor ne obavlja svoju dužnost u skladu sa zakonom, dozvolom Sistema, dozvolom, statutom, općim aktima i njegovim ugovorom o radu.
- (3) U slučaju razrješenja generalnog direktora, Upravni odbor dužan je odmah imenovati vršioca dužnosti, a u roku od 60 dana imenovati novog generalnog direktora.

Član 34.

(Prestanak BHRT-a)

- (1) Odluka o prestanku BHRT-a može biti donesena samo u formi zakona.
- (2) Zakonom o prestanku BHRT-a određuje se postupak prestanka i način raspodjele imovine.

Član 35.

(Prijelazne odredbe)

- (1) Do uspostavljanja RTV servisa na nivou Bosne i Hercegovine koji će vršiti prijenos na vlastitoj frekvenciji, BHRT će emitirati:
 - a) centralnu emisiju vijesti i druge informativne programe;
 - b) najznačajnije međunarodne sportske, kulturne i druge događaje, kad god je to moguće;
 - c) strani program vrhunske produkcije, u kvoti određenoj u dogovoru sa RTRS i RTVFBiH;
 - d) marketinški oglas i
 - e) druge programe, u dogovoru s RTVFBiH i RTRS, u okviru zajedničke programske sheme.
- (2) Programi BHRT-a emitiraju se u udarnim terminima i imaju prioritet u korištenju mreže.

Član 36.

(Konstituiranje Upravnog odbora)

- (1) Do dana konstituiranja Upravnog odbora u skladu s ovim zakonom traje mandat postojećeg Upravnog odbora Javnog RTV servisa BiH.
- (2) Stupanjem na snagu ovog zakona Regulatorna agencija će u roku od 30 dana pripremiti rang-listu, a u roku od 60 dana Parlamentarna skupština BiH imenovat će sve članove prvog Upravnog odbora prema odredbama ovog zakona.

(3) Konstituirajuća sjednica prvog Upravnog odbora bit će sazvana u roku od 15 dana od imenovanja svih članova. Upravni odbor dužan je usvojiti statut, imenovati generalnog direktora i osigurati registraciju u roku od 60 dana od konstituiranja.

(4) Mandat članova Upravnog odbora traje četiri godine. Međutim, kad Upravni odbor bude prvobitno konstituiran, članovi Upravnog odbora bit će imenovani na sljedeći način:

- a) jedan član na četiri godine,
- b) jedan član na tri godine,
- c) jedan član na dvije godine,
- d) jedan član na jednu godinu, izabran iz reda članova postojećeg Upravnog odbora Javnog RTV servisa BiH.

Ovim postupkom uvodi se princip rotacije među članovima upravnih tijela koji će osigurati kontinuitet rada za BHRT.

(5) Član imenovan na tri godine ostat će na dužnosti predsjedavajućeg u trajanju trogodišnjeg mandata. Nakon toga, članovi Upravnog odbora, u skladu s članom 25. ovog zakona, rotirat će se na dužnosti predsjedavajućeg.

Član 37.

(Završne odredbe)

Svi ranije doneseni zakoni i podzakonski akti, koji su regulirali Javni RTV servis BiH stupanjem na snagu ovog zakona prestaju važiti.

Član 37a.

(Upotreba jezika)

- (1) *Izrazi napisani samo u muškom rodu odnose se podjednako na muški i ženski rod.*
- (2) *U označavanju funkcija, zvanja i titula upotrebljavat će se gender senzitivni jezik.*

Član 38.

(Stupanje na snagu)

Ovaj Zakon stupa na snagu osmog dana od dana objavljivanja u "Službenom glasniku BiH".

"Službeni glasnik BiH" broj 32/10

Član 7.

Ovaj zakon stupa na snagu osmog dana od dana objavljivanja u "Službenom glasniku BiH".